



IEO-ARIÈJA - 11 rue Henri Fabre - 09100 PAMIERS
05 81 06 03 88 – ieo09@orange.fr
<http://arieja.ieo-opm.com/>

Pàmias, 15 de mai de 2025

A totes les aderents d'Ariège,

Un mot per vos dire la situacion de la seccion IEO d'Ariège, qu'es venguda mès que pessamentosa.

Ja en 2024 avèm passat l'annada sens cap de versament de la subvencion de la Region Occitanie Pyrénées-Méditerranée qu'es le nòstre partenari màger. La mitat de la subvencion arribèt pas qu'a la fin de decembre e sèm estats forçats en 2024, per poder pagar les salaris de las emplegadas de nos servir de tot çò qu'èra de costat e que veniá dels beneficis de la venda del Dictionari toponimic d'Ariège.

Ongan la situacion es la meteissa, avèm pas encara rebut res ni de la Region ni del departament, que nos deu encara 1000€ de l'an passat.

Avèm un budgècte previsional de gaireben 80.000 € amb una estimacion de subvencions de 28.000 € per 2025 ; çò que nos pòrta a un taus d'autofinançament de 65%.

Es pas brica aisit atal de poder contunhar nòstras accions e respectar nòstres engatjaments. Se volèm pas pèrdre tot çò bastit amassa dempuèi annadas (visibilitat de l'occitan dins Ariège, corses e talhièrs, projèctes, partenariats culturals...) nos fè mestièr una mobilizacion de las bèlas, collectiva e solidària per passar a l'accion lèu lèu.

Es pas possible de demorar resignats! L'IEO d'Ariège a de demorar viu per aparar l'occitan e desvolopar son usatge en çò nòstre.

Avèm besonh de moneda plan segur per contunhar una activitat minimala mas tanben d'idèas per trobar fonts novèlas de finançament, per diversificar nòstras ressorças, per inventar mejans de sosten novèls.

Ja le 23 de mai, un acamp del CA, alargat als responsables dels cercles locals es previst a Pàmias, vos convidam, se volètz d'i participar, per soscar amassa e decidir de las accions a venir. Le moment es vengut de vos fèr ausir. Avèm passat annadas a bastir, a semenar, a fèr viure l'occitan en Ariège. Es pas le moment de daissar tombar.

Òc, sèm dins las dificultats, mas avèm pas perdut le vam. Amb vòstra ajuda, amb vòstra preséncia, amb vòstre coratge, redreçarem la barra.

Cadun compta. Cada idèa pòt fèr flòri. Cada eurò pòt sosténer un projècte, una accion, una votz que parla occitan.

Participatz. Donatz, per que l'occitan contunhe d'existir e de fèr ligam dins nòstre parçan.
Amb la vòstra ajuda, tot pòt cambiar, tot demòra possible, per que visca l'occitan!

Annia Wolf, presidenta